



Na osnovu člana 22 Statuta Brčko distrikta Bosne i Hercegovine – prečišćeni tekst (Službeni glasnik Brčko distrikta Bosne i Hercegovine, broj 2/10), Skupština Brčko distrikta Bosne i Hercegovine na I. nastavku 56. redovne sjednice održanom 4. decembra 2019. godine, usvaja

ZAKON O PREUZIMANJU DIONIČKIH DRUŠTAVA

DIO PRVI – OSNOVNE ODREDBE

Član 1 (Predmet)

Ovim zakonom propisuju se uslovi i postupak za preuzimanje dioničkih društava, prava i obaveze učesnika u postupku preuzimanja i nadzor nad provođenjem postupka preuzimanja dioničkih društava.

Član 2 (Pojmovi)

Pojedini pojmovi upotrijebljeni u ovom zakonu imaju sljedeće značenje:

- a) „**ciljno društvo**“ je dioničko društvo čijim se dionicama trguje na uređenom tržištu papira od vrijednosti u Bosni i Hercegovini (u daljnjem tekstu: BiH) nad kojim ponudilac želi uspostaviti kontrolu kroz postupak preuzimanja;
- b) „**sticalac**“ je fizičko ili pravno lice koje posredno ili neposredno stekne ili namjerava steći dionice ciljnog društva, koje daju pravo glasa;
- c) „**dionica**“ je papir od vrijednosti koju izdaje ciljno društvo i koja daje pravo glasa;
- d) „**ponuda za preuzimanje**“ je obavezna ili dobrovoljna javna ponuda upućena svim dioničarima ciljnog društva za sticanje svih ili nekih dionica s pravom glasa, koja za cilj ima sticanje kontrole nad ciljnim društvom, uz uslove i na način propisan ovim zakonom;
- e) „**izdavalac**“ je domaće ili strano pravno lice koje izdaje ili namjerava izdati papire od vrijednosti i druge finansijske instrumente;
- f) „**ponudilac**“ je pravno ili fizičko lice koje objavi ponudu za preuzimanje svim dioničarima ciljnog društva za sticanje svih ili nekih dionica s pravom glasa;
- g) „**uređeno tržište**“ je tržište definisano Zakonom o papirima od vrijednosti.

Član 3 (Primjena Zakona)

- (1) Ovaj zakon se primjenjuje na preuzimanje dioničkih društava čije je sjedište u Brčko distriktu Bosne i Hercegovine (u daljnjem tekstu: Distrikt), pod uslovom da se dionicama koje su izdala ta društva trguje na uređenom tržištu u BiH.
- (2) Ovaj zakon ne primjenjuje se:
 - a) na trgovinu vlasničkih papira od vrijednosti određenog izdavaoca, kada se oni prodaju putem javnog tendera, odnosno na uređenom tržištu papira od vrijednosti, a radi se o dionicama čiji je zakoniti imalac Distrikt;
 - b) ako je sticalac Distrikt u postupku naplate svojih potraživanja stekao vlasnički udio koji prelazi prag za objavljivanje ponude.

Član 4 **(Supsidijarna primjena Zakona)**

U postupku pred Komisijom za papire od vrijednosti Brčko distrikta Bosne i Hercegovine (u daljnjem tekstu: Komisija) ako nije drugačije propisano ovim zakonom, primjenjuju se odredbe Zakona o upravnom postupku Brčko distrikta Bosne i Hercegovine (u daljnjem tekstu: Zakon o upravnom postupku).

DIO DRUGI – PREUZIMANJE DIONIČKIH DRUŠTAVA **POGLAVLJE I. OPĆA NAČELA**

Član 5 **(Opća načela)**

Opća načela postupka preuzimanja dioničkih društava su:

- a) svi dioničari ciljnog društva imaju ravnopravan položaj u postupku preuzimanja;
- b) ponudilac može objaviti ponudu za preuzimanje tek nakon što u cijelosti osigura novčanu naknadu i druge vrste naknada koje su propisane odredbama ovog zakona;
- c) dioničari ciljnog društva moraju biti potpuno, tačno i pravovremeno obaviješteni o ponudi za preuzimanje, kako bi imali dovoljno vremena da ispravno ocijene ponudu, definišu svoje interese i donesu odluku o prihvatanju ili odbijanju ponude za preuzimanje;
- d) uprava i nadzorni odbor ciljnog društva su dužni u toku provođenja postupka preuzimanja postupati u najboljem interesu dioničara ciljnog društva;
- e) ponudilac i ciljno društvo su dužni postupak preuzimanja provesti u najkraćem mogućem roku, kako ciljno društvo ne bi duže vremena od opravdanog bilo spriječeno u svom poslovanju;
- f) ponudilac i druga lica koja učestvuju u postupku preuzimanja ne smiju svojim djelovanjem na uređenom tržištu izazvati poremećaje, koji bi za posljedicu imali vještačko podizanje ili smanjivanje cijene dionica ciljnog društva.

Član 6 **(Zajedničko djelovanje)**

- (1) Fizička i pravna lica djeluju zajednički:
 - a) ako su se ugovorom, pismenim ili usmenim, odnosno izričito ili prešutno sporazumjela da usklađeno djeluju s ciljem sticanja dionica ciljnog društva ili ostvarivanja prava glasa iz dionica ciljnog društva;
 - b) ako jedno od njih drži dionice za račun drugog lica.
- (2) Fizička i pravna lica djeluju zajednički i kad jedno od njih, posredno ili neposredno, kontroliše drugo ili druga pravna lica.

- (3) U smislu stava 2 ovog člana smatra se da fizičko ili pravno lice kontroliše pravno lice ako:
 - a) posredno ili neposredno posjeduju najmanje 25% (dvadeset pet posto) udjela u osnovnom kapitalu pravnog lica;
 - b) posredno ili neposredno posjeduju najmanje 25% (dvadeset pet posto) glasačkih prava na skupštini dioničara pravnog lica;
 - c) ima pravo upravljanja, odnosno vođenja poslovne i finansijske politike pravnog lica na osnovu ovlaštenja iz statuta, sporazuma ili ugovora;
 - d) posredno ili neposredno ima preovlađujući uticaj na vođenje poslova i donošenje odluka.
- (4) Preduzeća djeluju zajednički ako su međusobno povezana u skladu sa Zakonom o preduzećima Brčko distrikta Bosne i Hercegovine (u daljnjem tekstu: Zakon o preduzećima).
- (5) Smatra se da fizička lica djeluju zajednički ako su u krvnom srodstvu u pravoj liniji neograničeno i u pobočnoj liniji do prvog stepena zaključno, te ako su bračni i vanbračni partneri.

Član 7 **(Način zajedničkog djelovanja)**

- (1) Uspostavljanje odnosa zajedničkog djelovanja sporazumom iz člana 6 stava 1 tačke a) ovog zakona izjednačeno je sa sticanjem dionica s pravom glasa.
- (2) Glasovima sticaoca dodaju se glasovi lica koja s njim zajednički djeluju.
- (3) Kad obaveza objavljivanja ponude za preuzimanje nastane uspostavljanjem odnosa zajedničkog djelovanja sporazumom iz člana 6 stava 1 tačke a) ovog zakona ili u slučaju kad jedno od lica koja zajednički djeluju stekne dionice tako da tim sticanjem nastane obaveza objavljivanja ponude za preuzimanje, svako od tih lica obavezno je da objavi ponudu za preuzimanje pod uslovima i na način propisan ovim zakonom.
- (4) Smatra se da je obaveza objavljivanja ponude za preuzimanje ispunjena ako ponudu objavi bilo koje od lica koja zajednički djeluju.
- (5) Lica koja zajednički djeluju solidarno odgovaraju za ispunjavanje svih obaveza propisanih ovim zakonom.
- (6) U slučaju iz stava 3 ovog člana, ciljno društvo ne može biti ponudilac.

POGLAVLJE II. OBAVEZA OBJAVLJIVANJA PONUDE ZA PREUZIMANJE

Član 8 **(Obaveza objavljivanja ponude za preuzimanje)**

- (1) Lice koje neposredno ili posredno, samostalno ili djelujući zajednički stekne dionice s pravom glasa ciljnog društva, tako da zajedno s dionicama, koje je već posjedovao pređe prag od 25% (dvadeset pet posto) dionica s pravom glasa ciljnog društva, obavezno je o sticanju bez odlaganja obavijestiti Komisiju, ciljno društvo, uređeno tržište i objaviti ponudu za preuzimanje, u skladu s odredbama ovog zakona.
- (2) Lice koje je na osnovu ponude za preuzimanje steklo manje od 75% (sedamdeset pet posto) od ukupnog broja glasova koje daju dionice izdavaoca s pravom glasa, u slučaju daljeg sticanja dionica istog izdavaoca, neposredno ili posredno putem zajedničkog djelovanja poveća postotak dionica za više od 10% (deset posto) obavezno je objaviti ponudu za preuzimanje.
- (3) Ako je lice koje je na osnovu ponude za preuzimanje steklo 75% (sedamdeset pet posto) ili više od ukupnog broja glasova koje daju dionice izdavaoca s pravom glasa, a naknadno otuđilo dionice izdavaoca tako da ponovo ima manje od 75% (sedamdeset pet

postu) od ukupnog broja glasova koje daju dionice izdavaoca s pravom glasa, u slučaju daljeg sticanja dionica istog izdavaoca pod uslovima iz stava 1 ovog člana, obavezno je objaviti ponudu za preuzimanje.

- (4) Lice koje na osnovu ugovora o kupoprodaji državnog kapitala, stekne nove dionice u postupku povećanja kapitala ciljnog društva po osnovu ugovorenih obaveza, nema obavezu objaviti ponudu za preuzimanje, ali prilikom svakog daljeg sticanja dionica istog ciljnog društva, dužno je objaviti ponudu za preuzimanje.
- (5) Obavještenje iz stava 1 ovog člana mora sadržavati podatke iz člana 12 stava 1 tački a, b i c ovog zakona, kao i izjavu ponudioca o obavezi objavljivanja ponude za preuzimanje u zakonom propisanom roku.
- (6) Obaveza obavještanja iz stava 1 ovog člana primjenjuje se uvijek kad za ponudioca nastane obaveza objavljivanja ponude za preuzimanje na način propisan ovim zakonom.

Član 9

(Zabrana izbjegavanja postupka preuzimanja i isključenje prava glasa)

- (1) Zabranjeno je svako javno objavljivanje ponude za preuzimanje koja nije upućena svim dioničarima ciljnog društva po istim uslovima sticanja, tzv. diskriminatorska ponuda.
- (2) Nije dopuštena ponuda mimo odredbi ovog zakona, odnosno javni ili drugi poziv upućen dioničarima ciljnog društva s ciljem sticanja dionica s pravom glasa, ukoliko bi takvim sticanjem nastala obaveza objavljivanja ponude za preuzimanje u skladu s članom 8 ovog zakona.
- (3) Sticalac koji stekne, odnosno kupi dionice dioničkog društva, kojima se nije trgovalo na uređenom tržištu u posljednja tri mjeseca prije dana sticanja tih dionica, a takvim sticanjem bi, prema odredbama člana 8 ovog zakona, nastala obaveza objavljivanja ponude za preuzimanje, nema pravo glasa po osnovu tako stečenih dionica dok se ne okonča postupak preuzimanja.

Član 10

(Izuzeci od obaveze objavljivanja ponude za preuzimanje)

- (1) Sticalac nije obavezan objaviti ponudu za preuzimanje ako:
 - a) stekne dionice ciljnog društva nasljeđivanjem;
 - b) stekne dionice ciljnog društva diobom zajedničke imovine bračnih partnera;
 - c) stekne dionice ciljnog društva u postupku povećanja osnovnog kapitala izdavanjem dionica putem zatvorene ponude, a skupština ciljnog društva na kojoj se donosi odluka o povećanju osnovnog kapitala, odobri da sticalac može steći dionice s pravom glasa ciljnog društva, bez obaveze objavljivanja ponude za preuzimanje, ako bi predmetnim sticanjem dionica s pravom glasa za sticaoca nastala obaveza objavljivanja ponude za preuzimanje;
 - d) stekne dionice ciljnog društva u zamjenu za isplatu dividende, ako je takva mogućnost predviđena zakonom, a skupština ciljnog društva odobri da sticalac može steći dionice s pravom glasa ciljnog društva, bez obaveze objavljivanja ponude za preuzimanje, ako bi predmetnim sticanjem dionica s pravom glasa za sticaoca nastala obaveza objavljivanja ponude za preuzimanje;
 - e) stekne dionice privremeno kao preuzimalac izdavanja papira od vrijednosti u skladu sa zakonom kojim se uređuju papiri od vrijednosti;
 - f) stekne dionice ciljnog društva kao stečajnog dužnika u stečajnom ili likvidacionom postupku;
 - g) stekne dionice izdavaoca zaključenjem sudskog poravnanja ili u postupku namirenja potraživanja kao izvršni povjerilac u sudskom postupku;
 - h) stekne dionice izdavaoca na osnovu prava preče kupovine;

- i) stekne dionice ciljnog društva u postupku pripajanja preduzeća, u slučaju kada samo jedno preduzeće, koje učestvuje u postupku pripajanja ima dionice ciljnog društva;
 - j) stekne dionice promjenom oblika organizovanja preduzeća;
 - k) stekne dionice ciljnog društva od drugog pravnog lica čiji su članovi ili dioničari neposredno ili posredno ista lica ili prenosom radi restrukturiranja unutar holdinga, ukoliko neće doći do promjene lica, koje kontroliše grupu;
 - l) stekne dionice u novom preduzeću, koje je nastalo spajanjem postojećih preduzeća ili podjelom postojećeg preduzeća;
 - m) stekne dionice isključivo s ciljem osiguranja potraživanja koje ponudilac ima prema društvu, pod uslovom da povjerilac ne koristi pravo glasa po osnovu stečenih dionica;
 - n) stekne najmanje 25% (dvadeset pet posto) dionica ciljnog društva s pravom glasa prije stupanja na snagu ovog zakona;
 - o) stekne najmanje 25% (dvadeset pet posto) dionica ciljnog društva na osnovu dobrovoljne ponude upućene svim dioničarima ciljnog društva, s tim da u slučaju daljnje kupovine dionica, ima obavezu objavljivanja ponude.
- (2) Odobrenje iz stava 1 tački c i d ovog člana, skupština ciljnog društva donosi 2/3 (dvotrećinskom) većinom glasova dionica zastupljenih na skupštini, ne računajući glasove sticaoca i lica koja s njim zajednički djeluju.

Član 11 **(Objavljivanje ponude i pravo glasa)**

Od dana objavljivanja obavještenja o sticanju dionica s pravom glasa ciljnog društva, kojim nastaje obaveza objavljivanja ponude za preuzimanje, do dana okončanja postupka preuzimanja, dionice ponudioaca i dionice lica koja s njim zajednički djeluju ne daju pravo glasa.

POGLAVLJE III. PONUDA ZA PREUZIMANJE

Član 12 **(Obavezan sadržaj ponude za preuzimanje)**

- (1) Ponuda za preuzimanje obavezno sadrži:
- a) naziv, sjedište i adresu ciljnog društva;
 - b) naziv, sjedište i adresu, odnosno ime, prezime i adresu ponudioaca kao i lica koja s njim zajednički djeluju, te opis načina zajedničkog djelovanja;
 - c) podatke o klasi i broju dionica, u apsolutnom i relativnom iznosu i glasova ciljnog društva, koje drži ponudilac i lica koja s njim zajednički djeluju;
 - d) podatke o klasi dionica koje su predmet ponude za preuzimanje;
 - e) postotak dionica koji čini uslov iz člana 15 stava 1 ovog zakona, ako je ponuda za preuzimanje uslovljena;
 - f) vrstu i broj dionica koje ponudilac ima namjeru i obavezu preuzeti, uključujući broj glasova u apsolutnom i procentualnom iznosu o svim dionicama ciljnog društva, koje pripadaju ponudiocu, uključujući i dionice lica koja s njim zajednički djeluju;
 - g) jasnu izjavu da se ponuda daje svim dioničarima ciljnog društva koji su vlasnici dionica s pravom glasa i da se ponudilac obavezuje kupiti svaku dionicu s pravom glasa, pod propisanim i objavljenim uslovima;
 - h) cijenu koju se ponudilac obavezuje platiti po dionici, rok i način plaćanja;
 - i) podatke o zamjenskim dionicama i pravima koja iz njih proizilaze, cijeni zamjenskih dionica, uslovima zamjene i izdavaocu zamjenskih dionica, kada ponuda uključuje zamjensku ili kombinovanu naknadu;
 - j) izvor i način osiguranja sredstava za plaćanje dionica koje su predmet ponude;

- k) naziv, sjedište i adresu ovlaštenog učesnika na uređenom tržištu, ukoliko se postupak preuzimanja provodi preko istog;
 - l) rok važenja ponude za preuzimanje;
 - m) firmu, sjedište i adresu depozitara;
 - n) detaljna uputstva o načinu deponovanja dionica i drugim pravima i obavezama dioničara koji deponuju dionice, a posebno o pravu dioničara da povlačenjem dionica iz depozita odustane od prihvata ponude za preuzimanje;
 - o) sporazum o načinu raspodjele dionica deponovanih u postupku preuzimanja na lica koja zajednički djeluju;
 - p) ciljeve ponudioca i njegove namjere u vezi s ciljnim društvom koje se preuzima u slučaju uspjeha ponude za preuzimanje i
 - r) ostale podatke ponude određene ovim zakonom, kao što je klauzula o korištenju prava na prinudnu prodaju.
- (2) Komisija može tražiti od ponudioca dopunu podataka iz sadržaja ponude za preuzimanje.
- (3) Uz ponudu, koju dostavlja Komisiji, ponudilac je obavezan priložiti u originalu ili ovjerenoj kopiji sljedeće isprave:
- a) dokaz o pravnom poslu na osnovu kojeg su ponudilac i lica koja s njim zajednički djeluju stekli dionice ciljnog društva u periodu od jedne godine prije dana nastanka obaveze objavljivanja ponude za preuzimanje;
 - b) izjavu ponudioca i lica koja s njim zajednički djeluju, da osim pravnih poslova iz tačke a) ovog stava, nisu zaključivali druge pravne poslove s ciljem sticanja dionica ciljnog društva;
 - c) bankarsku garanciju ili ugovor o kreditu, odnosno ugovor o otvaranju posebnog računa i dokaz o uplati novčanih sredstava, odnosno polaganju papira od vrijednosti za plaćanje dionica, u skladu s članom 22 stavom 1 ovog zakona;
 - d) ugovor sa depozitarom i ovlaštenim učesnikom na uređenom tržištu o obavljanju poslova deponovanja i preuzimanja dionica;
 - e) potvrdu uređenog tržišta na kojem su dionice ciljnog društva uvrštene u trgovanje, izdatu na zahtjev ponudioca, o prosječnoj cijeni iz člana 14 stavova 3 i 4 ovog zakona;
 - f) saglasnost nadležnog regulatornog organa, kada su predmet preuzimanje banke i osiguravajuća društva ili saglasnost druge nadležne institucije;
 - g) u ostalim slučajevima kada je to propisano;
 - h) ostalu dokumentaciju na zahtjev Komisije i
 - i) dokaz o uplati naknade.
- (4) Ako je ponudilac pravno ili fizičko lice sa sjedištem, odnosno prebivalištem ili boravištem u inostranstvu pored, isprava iz stava 3 ovog člana ponudilac je obavezan priložiti i:
- a) punomoć kojom ovlašćuje advokata, banku ili ovlaštenog učesnika za dostavu pismena u Distriktu i
 - b) izvod iz registra privrednih subjekata ili drugog odgovarajućeg registra, ne stariji od 30 dana, preveden na jedan od službenih jezika u upotrebi u BiH.

Član 13 **(Rok važenja ponude za preuzimanje)**

- (1) Rok važenja ponude iznosi najmanje 21 dan, a najduže 45 dana od dana objavljivanja ponude za preuzimanje u skladu s članom 24 stavom 1 ovog zakona.
- (2) U slučaju objavljivanja konkurentskih ponuda za preuzimanje rok prvobitne ponude se produžava do isteka roka važenja konkurentskih ponuda.
- (3) Komisija može odrediti duži rok od roka navedenog u stavu 1 ovog člana pod uslovom da ciljno društvo saziva skupštinu dioničara radi razmatranja ponude.

- (4) U slučaju objavljivanja izmjene ponude za preuzimanje, rok važenja ponude se produžava za sedam dana, s tim da ukupan rok važenja ponude ne može biti duži od 60 dana.
- (5) U slučaju produženja roka zbog objavljivanja konkurentskih ponuda, ukupan rok važenja svih ponuda ne može biti duži od 70 dana.
- (6) Ako posljednji dan roka važenja ponude za preuzimanje pada u neradni dan, posljednjim danom roka važenja ponude za preuzimanje smatra se prvi sljedeći radni dan.

Član 14 **(Cijena u ponudi za preuzimanje)**

- (1) Ponudilac i lica koja s njim zajednički djeluju dužni su za sve dionice iste klase ponuditi jednaku cijenu.
- (2) Cijena u ponudi za preuzimanje ne može biti niža od najviše cijene po kojoj su ponudilac i lica koja s njim zajednički djeluju stekli dionice s pravom glasa u periodu od jedne godine prije dana nastanka obaveze.
- (3) Ako je prosječna cijena dionica ostvarena na uređenom tržištu na kojem su dionice ciljnog društva uvrštene u trgovanje viša od cijene iz stava 2 ovog člana, ponudilac je dužan ponuditi višu cijenu, s tim da se prosječna cijena izračunava za svako uređeno tržište kao ponderisani prosjek svih cijena ostvarenih na uređenom tržištu u zadnja tri mjeseca prije nastanka obaveze za objavljivanje ponude za preuzimanje.
- (4) Ako ponudilac i lica koja s njim zajednički djeluju nisu u periodu od jedne godine prije dana nastanka obaveze stekli dionice s pravom glasa, cijena u ponudi ne može biti niža od prosječne cijene ostvarene na uređenom tržištu na kojem su dionice ciljnog društva uvrštene u trgovanje.
- (5) Ako je ponudilac stekao dionice u javnoj ponudi, cijena u ponudi ne može biti niža od prosječne cijene ostvarene na uređenom tržištu na kojem su dionice ciljnog društva uvrštene u trgovanje u skladu sa stavom 3 ovog člana.
- (6) Ako ponudilac ili lice koje s njim zajednički djeluje, protivno odredbi člana 36 ovog zakona, stekne ili otuđi dionice ciljnog društva po cijeni višoj od cijene iz stavova 2, 3 i 4 ovog člana, dužan je u ponudi za preuzimanje ponuditi višu cijenu.
- (7) Ako ponudilac zahtjev za odobrenje objavljivanja ponude za preuzimanje ne podnese u roku iz člana 20 stava 1 ovog zakona, prosječna cijena iz stava 3 ovog člana izračunava se kao ponderisani prosjek svih cijena ostvarenih na uređenom tržištu na kojem su dionice ciljnog društva uvrštene u trgovanje za svako sljedeće tromjesečje posebno, počevši od tromjesečja koje prethodi danu nastanka obaveze za objavljivanje ponude za preuzimanje do dana podnošenja zahtjeva, s tim da je ponudilac dužan u ponudi za preuzimanje ponuditi minimalno najvišu tromjesečnu prosječnu cijenu izračunatu u navedenom periodu, ako je ta cijena viša od cijene iz stava 2 ovog člana.
- (8) Ako ponudilac ili lice koje s njim zajednički djeluje u roku od jedne godine od dana proteka roka trajanja ponude za preuzimanje, stekne dionice ciljnog društva koje su bile predmet ponude, po cijeni koja je viša od cijene iz ponude, dužan je dioničarima koji su prihvatili ponudu za preuzimanje isplatiti razliku u cijeni u roku od sedam dana od dana sticanja.
- (9) Obaveza iz stava 8 ovog člana ne odnosi se na sticanje dionica u slučaju povećanja osnovnog kapitala ili reorganizacije ciljnog društva u skladu sa Zakonom o preduzećima ili u slučaju sticanja dionica ciljnog društva u zamjenu za isplatu dividende, ako je ta mogućnost predviđena zakonom.
- (10) Ponudilac u dobrovoljnoj ponudi za preuzimanje slobodno utvrđuje cijenu za kupovinu dionica.

Član 15 **(Uslovna i bezuslovna ponuda za preuzimanje)**

- (1) Uslovna ponuda za preuzimanje je ponuda u kojoj je ponudilac kao uslov za sticanje dionica s pravom glasa ciljnog društva odredio najmanji broj tih dionica, koji može biti izražen i u procentu, koje on želi da stekne.
- (2) U slučaju uslovne ponude iz stava 1 ovog člana, zabranjeno je ponudiocu, odnosno zajedničkom sticaocu, preduzeću koja su pod kontrolom ponudioca, preduzeću koje neposredno ili posredno kontroliše lice koje kontroliše i ponudioca ili lica koja pružaju usluge ponudiocu u vezi s preuzimanjem, svojim djelovanjem uticati na ispunjenje tog uslova.
- (3) Kada je ponudilac uslovio ponudu, a nije stekao određen broj dionica utvrđen u ponudi do isteka roka za njeno prihvatanje, ne može kupiti dionice koje su mu dioničari ciljnog društva položili na račun.
- (4) Ponudilac je, u slučaju iz stava 1 ovog člana, dužan dioničarima vratiti o svom trošku dionice koje su mu dioničari ciljnog društva položili na račun, a najkasnije u roku od tri radna dana od dana dobijanja potvrde od Registra papira od vrijednosti Brčko distrikta Bosne i Hercegovine (u daljnjem tekstu: Registar) o rezultatu ponude.
- (5) Kada je ponudilac odredio uslov za sticanje dionica pa je određeni broj dionica u ponudi stekao do isteka roka za njeno prihvatanje, dužan je kupiti sve dionice koje su mu dioničari ciljnog društva položili na račun, bez obzira na broj dionica, koji je utvrđen u ponudi, a pod istim uslovima iz ponude.
- (6) Bezuslovna ponuda za preuzimanje je ona u kojoj nije izričito i jasno označen uslov za sticanje dionica.

Član 16

(Dobrovoljna ponuda za preuzimanje)

- (1) Lice koje nije obavezno objaviti ponudu za preuzimanje u skladu s odredbama ovog zakona, a namjerava izvršiti preuzimanje, ponudu za preuzimanje može objaviti samo pod uslovima i na način propisan ovim zakonom.
- (2) U slučaju iz stava 1 ovog člana, lice koje namjerava izvršiti preuzimanje dužno je o namjeri objavljivanja ponude za preuzimanje dostaviti obavještenje Komisiji, ciljnom društvu i uređenom tržištu, te isto objaviti u skladu s članom 24 ovog zakona.
- (3) Objavljivanjem obavještenja iz stava 2 ovog člana, za ponudioca nastaje obaveza objavljivanja ponude za preuzimanje pod uslovima i na način propisan ovim zakonom.

Član 17

(Konkurentska ponuda za preuzimanje)

- (1) Konkurentska ponuda je ponuda za preuzimanje koju u skladu s ovim zakonom može podnijeti svako pravno ili fizičko lice i to samo nakon objavljivanja ponude i u periodu trajanja prve ponude za preuzimanje.
- (2) Nakon što ponudilac objavi ponudu za preuzimanje, trećim licima nije dopušteno u sredstvima javnog informisanja ili u elektronskim medijima dostupnim javnosti objaviti namjeru sticanja dionica ciljnog društva, već su ta lica dužna objaviti konkurentsku ponudu za preuzimanje u skladu s odredbama ovog zakona.
- (3) Podnosilac konkurentske ponude ne može biti lice koje zajednički djeluje s ponudiocem u skladu s članom 6 ovog zakona, kao ni lice koje djeluje u ime ponudioca u postupku preuzimanja.
- (4) Zahtjev za odobrenje objavljivanja konkurentske ponude podnosilac konkurentske ponude dostavlja Komisiji.
- (5) Komisija o zahtjevu iz stava 4 ovog člana donosi rješenje u roku od pet dana od dana prijema zahtjeva.

- (6) Podnosilac konkurentske ponude je dužan odmah po prijemu rješenja iz stava 5 ovog člana, a najkasnije deset dana prije isteka roka važenja prve ponude, objaviti svoju ponudu u skladu s članom 24 ovog zakona.
- (7) U slučaju konkurentske ponude ne objavljuje se obavještenje o namjeri preuzimanja.
- (8) Svaka izmjena konkurentske ponude može se vršiti samo u skladu s članom 25 ovog zakona.
- (9) Ako je prva ponuda uslovljena najmanjim brojem dionica koje ponudilac treba steći, konkurentska ponuda ne smije glasiti na sticanje većeg broja dionica.
- (10) U slučaju objave konkurentske ponude rok trajanja ponude za preuzimanje produžava se do isteka roka trajanja konkurentske ponude. Ponudilac je dužan o produženju roka trajanja ponude za preuzimanje dostaviti obavijest ciljnom društvu, uređenom tržištu na kojem su uvrštene u trgovanje dionice ciljnog društva, Registru i ovlaštenom učesniku, te istu objaviti na način i u roku određenom članom 24 ovog zakona.

Član 18

(Naknada za isplatu dionica u ponudi za preuzimanje)

- (1) Ponudilac kao naknadu za preuzimanje dionica koje su predmet ponude za preuzimanje može ponuditi:
 - a) novac tzv. novčana naknada;
 - b) zamjenske dionice tzv. zamjenska naknada i
 - c) srazmjeran dio novca i zamjenskih dionica u kojem slučaju ponudilac omjer novca i zamjenskih dionica može slobodno odrediti tzv. kombinovana naknada.
- (2) Kada ponudilac za preuzimanje dionica koje su predmet ponude za preuzimanje nudi zamjensku ili kombinovanu naknadu, dužan je ponuditi novčanu naknadu kao alternativu.
- (3) Kada se naknada ponuđena od strane ponudioca ne sastoji od papira od vrijednosti koji se mogu unovčiti i koji su uvršteni radi trgovanja na uređenom tržištu, ta naknada mora uključivati alternativu u novcu.

Član 19

(Povlačenje ponude)

- (1) Objavljenu ponudu za preuzimanje ponudilac može povući u slučaju:
 - a) objavljivanja konkurentske ponude za preuzimanje po višoj cijeni i
 - b) stečaja ciljnog društva.
- (2) Ponudilac je dužan o povlačenju ponude za preuzimanje obavijestiti Komisiju, ciljno društvo, uređeno tržište na kojem su uvrštene u trgovanje dionice ciljnog društva, Registar, kao i ovlaštenog učesnika, najkasnije naredni radni dan od dana donošenja odluke o povlačenju.
- (3) Povlačenje ponude za preuzimanje ponudilac je dužan objaviti u skladu s članom 24 ovog zakona.

POGLAVLJE IV. POSTUPAK OBJAVLJIVANJA PONUDE ZA PREUZIMANJE

Član 20

(Zahtjev za odobrenje objavljivanja ponude za preuzimanje)

- (1) Ponudilac je obavezan u roku od 30 dana od dana nastanka obaveze preuzimanja podnijeti Komisiji:
 - a) zahtjev za odobrenje objavljivanja ponude za preuzimanje;

- b) ponudu za preuzimanje;
 - c) tekst obavještenja o namjeri preuzimanja u slučaju objavljivanja dobrovoljne ponude;
 - d) isprave iz člana 12 stava 3 ovog zakona i
 - e) ostalu dokumentaciju na zahtjev Komisije.
- (2) Komisija je dužna donijeti rješenje po zahtjevu iz stava 1 tačke a) ovog člana, u roku od 14 dana od dana prijema urednog zahtjeva.
 - (3) Izuzetno od stava 2 ovog člana, kada su predmet preuzimanja banke ili osiguravajuća društva, rok za donošenje rješenja iz stava 2 ovog člana počinje teći od dana prijema odluke o saglasnosti nadležnog organa, ukoliko je davanje takve saglasnosti propisano.
 - (4) Izuzetno od stava 2 ovog člana, kada Komisija sarađuje s organima nadležnim za kontrolu monopola, sprečavanje pranja novca i drugim organima, a radi sprečavanja poremećaja na uređenom tržištu, rok za donošenje rješenja može se produžiti do dana pribavljanja te isprave.
 - (5) Ponudilac je dužan Komisiji podnijeti zahtjev za odobrenje objavljivanja izmjene ponude za preuzimanje, najkasnije 14 dana prije isteka roka trajanja ponude.
 - (6) Komisija donosi rješenje o podnesenom zahtjevu iz stava 5 ovog člana u roku od tri dana od dana prijema urednog zahtjeva.
 - (7) Rješenja iz stavova 2 i 6 ovog člana Komisija donosi kada utvrdi:
 - a) potpunost i vjerodostojnost podataka iz ponude za preuzimanje i isprava podnesenih uz zahtjev u skladu s članom 12 ovog zakona;
 - b) da je cijena u ponudi za preuzimanje utvrđena u skladu s ovim zakonom i
 - c) da je ponudilac u slučaju povećanja cijene u izmijenjenoj ponudi osigurao sredstva za podmirenje u skladu s članom 22 ovog zakona.
 - (8) Prilikom odlučivanja o zahtjevu iz stava 1 tačke a) i stava 5 ovog člana, Komisija ne ocjenjuje opravdanost i cjelishodnost elemenata ponude za preuzimanje.
 - (9) Ukoliko prilikom odlučivanja o zahtjevu iz stava 1 tačke a) i stava 5 ovog člana Komisija utvrdi određene nepravilnosti, dužna je naložiti ponudiocu njihovo otklanjanje, u roku od sedam dana od dana utvrđivanja nepravilnosti.
 - (10) Ako ponudilac u ostavljenom roku ne postupi po zahtjevu Komisije, smatra se da zahtjev nije ni podnesen, a Komisija donosi zaključak kojim se zahtjev odbacuje.
 - (11) Komisija ne odgovara za tačnost i istinitost podataka navedenih u ponudi za preuzimanje.
 - (12) Ako u ponudi za preuzimanje nedostaju podaci koji bi mogli uticati na odluku dioničara o prihvatanju ponude za preuzimanje ili su u ponudi za preuzimanje navedeni neistiniti i netačni podaci, sva lica koja su sudjelovala u izradi i pripremi ponude za preuzimanje, solidarno odgovaraju dioničarima ciljnog društva za moguću štetu, koja bi zbog toga nastala.

Član 21 (Saglasnost)

Kada su predmet preuzimanja banke ili osiguravajuća društva, ponudilac istovremeno s podnošenjem zahtjeva za odobrenje objavljivanja ponude Komisiji, podnosi i zahtjev za dobijanje saglasnosti nadležnoj regulatornoj agenciji, odnosno drugom nadležnom organu, u slučaju kada je to propisano posebnim zakonom.

Član 22 (Osiguranje sredstava)

- (1) Prije podnošenja zahtjeva za odobrenje objavljivanja ponude za preuzimanje, ponudilac je obavezan osigurati neophodna sredstva za kupovinu dionica na jedan od sljedećih načina:

- a) da na poseban račun kod banke izdvoji novčana sredstva ili položi papire od vrijednosti na poseban račun kod Registra koja su potrebna za plaćanje dionica na koje se odnosi ponuda za preuzimanje;
 - b) da sa bankom zaključi ugovor o odobrenom kreditu za tu namjenu i
 - c) da osigura neopozivu bankarsku garanciju na prvi poziv, za iznos potreban za plaćanje dionica na koje se odnosi ponuda za preuzimanje.
- (2) Kada se kao ponudilac javlja banka, osiguranje sredstava na način iz stava 1 ovog člana banka je obavezna ugovoriti s drugom bankom.
 - (3) Rok trajanja bankarske garancije iz stava 1 tačke c) ovog člana mora biti najmanje sedam dana od posljednjeg dana roka za plaćanje dionica iz člana 27 stava 2 ovog zakona.
 - (4) Novčanim sredstvima ili papirima od vrijednosti iz stava 1 tačke a) ovog člana, izdvojenim na poseban račun, ponudilac ne može raspolagati dok traje ponuda za preuzimanje.
 - (5) Po isteku roka važenja ponude za preuzimanje, odnosno nakon isteka roka za plaćanje, ponudilac može s posebnog računa podići višak iznad sredstava potrebnih za plaćanje deponovanih dionica tek nakon izvršavanja svih obaveza nastalih po osnovu stečenih dionica ciljnog društva.
 - (6) Ponudilac ne smije u toku trajanja ponude za preuzimanje mijenjati uslove ugovora o posebnom računu ili ugovora o odobrenom kreditu, odnosno ugovora o bankarskoj garanciji za plaćanje svih dionica na koje se odnosi ponuda za preuzimanje, osim u slučaju poboljšanja ponude.
 - (7) Ako je ponudilac lice s prebivalištem, odnosno sjedištem van teritorije Distrikta, dužan je novčana sredstva položiti na račun kod banke ili osiguranja iz stava 1 tački b) i c) ovog člana pribaviti od banke sa sjedištem u BiH s poslovnom jedinicom u Distriktu.

Član 23 **(Osiguranje poslova deponovanja dionica)**

- (1) Prije podnošenja zahtjeva za odobrenje objavljivanja ponude za preuzimanje ponudilac je obavezan otvoriti poseban račun papira od vrijednosti kod Registra za potrebe deponovanja dionica, na koji se preknjižavaju dionice s računa dioničara ciljnog društva radi prihvatanja ponude za preuzimanje.
- (2) Ponudilac je obavezan s ovlaštenim licem za postupak preuzimanja zaključiti ugovor o vođenju posebnog računa papira od vrijednosti i provođenju postupka preuzimanja.
- (3) Prilikom zaključenja ugovora iz stava 2 ovog člana ponudilac je dužan dostaviti sve podatke potrebne za pripremu i obavljanje poslova deponovanja dionica, kao i za obavljanje drugih poslova u vezi s preuzimanjem.

Član 24 **(Objavljivanje ponude)**

- (1) Ponudu za preuzimanje i svaku izmjenu ponude ponudilac je obavezan objaviti u formi oglasa u najmanje jednom dnevnom listu koji izlazi i koji je dostupan u svakom od entiteta BiH i Distriktu, a s ciljem informisanja svih dioničara ciljnog društva.
- (2) Ukoliko se s dionicama ciljnog društva trguje na uređenom tržištu drugih država, ponudilac je obavezan ponudu objaviti i u dnevnom listu dostupnom u toj državi, a može je objaviti i na internet stranici ciljnog društva i uređenog tržišta na kojem se trguje dionicama ciljnog društva.
- (3) Ponudilac je obavezan ponudu za preuzimanje objaviti u roku od sedam dana od dana prijema rješenja Komisije iz člana 20 stava 2 ovog zakona.
- (4) Ponuda za preuzimanje objavljena nakon isteka navedenog roka je valjana.
- (5) Izmjenu ponude za preuzimanje ponudilac je obavezan objaviti najkasnije 10 dana prije isteka roka važenja ponude za preuzimanje.

- (6) Izmijenjena ponuda za preuzimanje objavljena nakon isteka navedenog roka je valjana.
- (7) Kopiju objavljenog teksta ponude iz stavova 1 i 2 ovog člana ponudilac je dužan odmah dostaviti Komisiji.
- (8) Ponudu za preuzimanje i svaku izmjenu ponude ponudilac je obavezan dostaviti ciljnom društvu, uređenom tržištu na kojem se trguje dionicama ciljnog društva, Registru i ovlaštenom učesniku i obavijestiti svoje zaposlene ili predstavnike zaposlenih putem svoje internet stranice, prvi naredni radni dan od dana prijema rješenja Komisije.
- (9) Ciljno društvo je obavezno najkasnije prvi naredni radni dan nakon prijema objavljene ponude za preuzimanje obavijestiti predstavnike zaposlenih, odnosno zaposlene o sadržaju ponude za preuzimanje, objavljivanjem sadržaja na svojoj internet stranici i internet stranici uređenog tržišta.
- (10) Rok važenja ponude se računa od dana objavljivanja ponude za preuzimanje na način iz stavova 1 i 2 ovog člana.

Član 25 **(Izmjena ponude za preuzimanje)**

- (1) Ponuda za preuzimanje se može mijenjati samo s ciljem poboljšanja.
- (2) Ponudu za preuzimanje ponudilac može izmijeniti na način da poveća ponuđenu cijenu ili ponudi veći broj papira od vrijednosti. Kada mijenja cijenu, ponudilac mora ponuđenu cijenu povećati za najmanje 10% (deset posto).
- (3) Do isteka roka iz člana 24 stava 5 ovog zakona ponudilac je dužan ispuniti sljedeće uslove:
 - a) pribaviti rješenje Komisije o odobrenju objavljivanja izmjene ponude za preuzimanje;
 - b) objaviti izmjenu ponude za preuzimanje;
 - c) osigurati razliku naknade za plaćanje dionica koje su predmet ponude za preuzimanje i
 - d) o izmjeni ponude za preuzimanje obavijestiti Registar i ovlaštenog učesnika.
- (4) Ukoliko ponudilac u skladu s odredbama ovog zakona izmijeni ponudu za preuzimanje, smatra se da su dioničari koji su prihvatili ponudu za preuzimanje prihvatili i izmijenjenu ponudu za preuzimanje.

Član 26 **(Zabrana oglašavanja i vršenja uticaja na dioničare)**

Nakon što ponudilac objavi ponudu za preuzimanje, ponudiocu, odnosno upravi ponudioca ako je pravno lice, dioničaru, ciljnom društvu i upravi ciljnog društva bez obzira da li su učesnici u preuzimanju, zabranjeno je direktno ili oglašavanjem putem sredstava javnog informisanja vršiti uticaj na dioničare ciljnog društva nuđenjem ili obećanjem poklona, usluge, imovinske ili druge koristi.

Član 27 **(Prihvatanje ponude i rok plaćanja dionica)**

- (1) Dioničar prihvata ponudu tako što kod notara potpisuje i ovjerava izjavu o prihvatanju ponude i na taj način daje nalog da se dionice koje su predmet ponude za preuzimanje, deponuju na poseban račun kod Registra.

- (2) Rok plaćanja dionica ciljnog društva određuje se u danima od dana isteka roka važenja ponude i iznosi tri radna dana od posljednjeg dana važenja ponude.
- (3) Ponudilac ne smije izvršiti plaćanje prije isteka roka važenja ponude.
- (4) Dioničar ne može raspolagati dionicama koje je deponovao radi prihvata ponude.
- (5) Dioničar može deponovane dionice povući do isteka roka važenja ponude.
- (6) Izuzetno od stava 5 ovog člana, dioničar može povući deponovane dionice i po isteku tog roka, ako ponudilac ne plati dionice u roku predviđenom za plaćanje dionica.
- (7) Povlačenje deponovanih dionica znači odustanak od prihvata ponude, odnosno raskid ugovora.

Član 28

(Uslovljavanje ponude za preuzimanje i deponovanje dionica)

- (1) Obavezu kupovine dionica koje su predmet ponude za preuzimanje ponudilac ne može ničim uslovljavati.
- (2) Izuzetno od stava 1 ovog člana, ponudilac može u ponudi za preuzimanje odrediti da predmet ponude za preuzimanje nisu dionice na kojima je zasnovan teret.
- (3) U postupku prihvata ponude za preuzimanje u Registru se deponuju dionice, preknjižavanjem s računa dioničara ciljnog društva na poseban račun otvoren za potrebe deponovanja dionica.
- (4) U slučaju povlačenja deponovanih dionica, dionice se s posebnog računa otvorenog za potrebe deponovanja vraćaju na račune dioničara.
- (5) Upisane, a neplaćene dionice ne mogu biti predmet deponovanja.

Član 29

(Pravo na povlačenje dionica)

- (1) Dioničar se ne može odreći prava na povlačenje dionica s računa za deponovanje.
- (2) Ponudilac se ne može pozivati na izjavu dioničara o odricanju od prava na povlačenje dionica.

Član 30

(Uvid u podatke o dionicama kod Registra)

Kada je za ponudioca nastala obaveza objavljivanja ponude za preuzimanje, ciljno društvo, odnosno Registar dužni su ponudiocu, na njegov zahtjev, omogućiti uvid u podatke koji se odnose na dioničare i dionice ciljnog društva, koji se vode kod Registra.

Član 31

(Prenos dionica na osnovu ponude za preuzimanje)

- (1) Ako je dioničar deponovao dionice u skladu s uslovima iz ponude za preuzimanje, dejstvo prihvata ponude za preuzimanje i obaveza ponudioca da plati cijenu za deponovane dionice nastaje istekom roka važenja ponude za preuzimanje, osim u slučajevima iz člana 15 stava 3 i člana 19 ovog zakona.
- (2) Ponudilac ne može preuzeti deponovane dionice, odnosno one ne mogu biti prenesene na ponudioca prije isteka roka važenja ponude i dok ne budu plaćene.

Član 32

(Izvještaj o preuzimanju)

- (1) Nakon isteka roka važenja ponude za preuzimanje i nakon isteka roka za plaćanje, ponudilac je obavezan u roku od tri radna dana izvještaj o preuzimanju:

- a) dostaviti Komisiji, ciljnom društvu i uređenom tržištu;
 - b) objaviti na način propisan članom 24 ovog zakona.
- (2) Izvještaj iz stava 1 ovog člana sadrži podatke o:
- a) firmi, obliku organizovanja, sjedištu i adresi u sjedištu pravnog lica, odnosno ime, prezime i adresu ponudioca – fizičkog lica;
 - b) firmi, obliku organizovanja, sjedištu i adresi u sjedištu pravnog lica, odnosno ime, prezime i adresu fizičkih lica koja s ponudiocem zajednički djeluju;
 - c) firmi i adresi u sjedištu ciljnog društva;
 - d) broju dioničara koji su prihvatili ponudu za preuzimanje;
 - e) broju deponovanih dionica, u apsolutnom i relativnom iznosu, koje je ponudilac isplatio;
 - f) broju deponovanih dionica za koje je sporna činjenica deponovanja ili povlačenja i
 - g) broju i postotku dionica ciljnog društva koje ponudilac i lica koja s njim zajednički djeluju, pojedinačno i ukupno, stiču nakon ponude za preuzimanje.
- (3) Ako se radi o uslovnoj ponudi u skladu s članom 15 stavom 1 ovog zakona i ako u roku trajanja ponude ne bude deponovano dovoljno dionica, ovlašteni učesnik je obavezan bez odlaganja o tome, kao i o ukupnom broju deponovanih dionica, obavijestiti Komisiju, ciljno društvo, ponudioca i svakog dioničara.
- (4) Komisija je dužna u roku od pet radnih dana od dana prijema izvještaja iz stavova 1 i 3 ovog člana donijeti rješenje o uspješnosti preuzimanja, a Registar najkasnije narednog radnog dana vrši prenos dionica.
- (5) Ponudilac je obavezan u roku od tri dana od dana kada je primio rješenje iz stava 4 ovog člana objaviti obavijest o uspješnosti preuzimanja, na način iz člana 24 stavova 1 i 2 ovog zakona.

Član 33 **(Plaćanje cijene dionica i troškovi)**

Ponudilac snosi troškove deponovanja dionica, plaća cijenu dionica, snosi sve troškove prenosa dionica, troškove otvaranja računa dioničara za isplatu novčanih sredstava po osnovu prinudne prodaje, kao i sve ostale troškove koji proizilaze iz ponude za preuzimanje.

POGLAVLJE V. OGRANIČENJA I PRAVA U VEZI S PREUZIMANJEM

Član 34 **(Obaveze i ograničenja djelovanja uprave i nadzornog odbora ciljnog društva)**

- (1) Od trenutka zaprimanja obavještenja o sticanju dionica iz člana 8 stava 1 i obavještenja o namjeri objavljivanja ponude za preuzimanje iz člana 16 stava 2 ovog zakona, odnosno od objave istih, do okončanja postupka preuzimanja ciljnog društva, uprava i nadzorni odbor ciljnog društva ne mogu bez odobrenja skupštine:
- a) povećati osnovni kapital izdavanjem novih dionica po bilo kojem osnovu;
 - b) zaključivati poslove koji izlaze izvan okvira redovnog poslovanja ciljnog društva;
 - c) djelovati na način koji bi mogao ozbiljnije ugroziti daljnje poslovanje ciljnog društva ili zaključivati poslove koji bi mogli značajnije ugroziti dalje poslovanje ciljnog društva;
 - d) odlučiti o sticanju i otuđenju vlastitih dionica ciljnog društva ili papira od vrijednosti, koji daju pravo na te dionice i
 - e) djelovati na način, koji bi imao za cilj ometanje ili onemogućavanje ponude za preuzimanje.
- (2) Odluke uprave ili nadzornog odbora ciljnog društva iz stava 1 ovog člana, koje su donesene prije prijema obavještenja iz člana 8 stava 1 i člana 16 stava 2 ovog zakona, ili

objave istih, a nisu u cijelosti provedene, mora prije provođenja objaviti skupština ciljnog društva.

- (3) Odluke donesene, odnosno provedene suprotno stavovima 1 i 2 ovog člana, ništavne su.
- (4) Pravni poslovi zaključeni suprotno stavu 1 ovog člana su ništavni.
- (5) U roku iz stava 1 ovog člana, uprava i nadzorni odbor ciljnog društva može slobodno, bez odobrenja skupštine dioničara, tražiti konkurentne ponude za preuzimanje ciljnog društva.
- (6) Skupština dioničara ciljnog društva, na kojoj se odlučuje o pitanjima iz stavova 1 i 2 ovog člana, saziva se najkasnije 14 dana prije dana održavanja sjednice skupštine.
- (7) Skupština dioničara ciljnog društva o davanju odobrenja iz stavova 1 i 2 ovog člana odlučuje prostom većinom glasova ukupnog broja dionica s pravom glasa.
- (8) Skupština društva može donijeti odluku kojom se ne primjenjuju ograničenja za upravu ili nadzorni odbor iz stava 1 i stava 4 ovog člana, ukoliko je ponudilac društvo koje ne primjenjuje te odredbe prema zakonima u mjestu svog sjedišta ili društvo koje je kontrolisano od strane tog društva, shodno članu 6 stavu 3 ovog zakona.

Član 35

(Zabrana ograničenja u pogledu broja glasova i članova uprave)

- (1) Od trenutka zaprimanja obavještenja iz člana 8 stava 1 i obavještenja iz člana 16 stava 2 ovog zakona do okončanja postupka preuzimanja ciljno društvo ne može u osnivačkom aktu ili statutu predvidjeti ograničenja u pogledu broja glasova koje nose dionice s pravom glasa.
- (2) Ukoliko su ograničenja iz stava 1 ovog člana predviđena u osnivačkom aktu ili statutu, skupština dioničara ih može prostom većinom glasova staviti van snage.
- (3) Nakon okončanja postupka preuzimanja skupština dioničara može 2/3 (dvotrećinskom) većinom glasova staviti van snage odredbe osnivačkog akta ili statuta kojima su predviđena ograničenja koja se odnose na mandat i izbor članova uprave, nadzornog odbora i direktora.

Član 36

(Zabrana sticanja i otuđivanja dionica s pravom glasa)

- (1) Ponudilac i lica koja s njim zajednički djeluju, od trenutka objavljivanja ponude za preuzimanje do isteka roka važenja ponude, ne smiju:
 - a) steći dionice s pravom glasa ciljnog društva;
 - b) se obavezati da će ih steći na drugi način, osim ponudom za preuzimanje;
 - c) otuđivati dionice i
 - d) se obavezati da će otuđiti dionice s pravom glasa ciljnog društva.
- (2) Odredbe stava 1 ovog člana shodno se primjenjuju i u slučaju objave obavještenja o namjeri objavljivanja dobrovoljne ponude za preuzimanje.

Član 37

(Mišljenje uprave i nadzornog odbora)

- (1) U roku od sedam dana od dana objavljivanja ponude za preuzimanje, uprava i nadzorni odbor ciljnog društva obavezni su objaviti svoje obrazloženo mišljenje o ponudi za preuzimanje putem internet stranice uređenog tržišta koje mora sadržavati:
 - a) mišljenje o vrsti i visini ponuđene naknade;
 - b) mišljenje o namjeri ponudioca u pogledu budućeg poslovanja ciljnog društva;
 - c) mišljenje o strateškim planovima ponudioca u odnosu na ciljno društvo i mogućim posljedicama provođenja tih planova na politiku zapošljavanja i radno-pravni status

- zaposlenika ciljnog društva, kao i na moguće promjene vezane uz mjesta u kojima društvo obavlja svoju djelatnost;
- d) izjave članova uprave i nadzornog odbora o njihovoj namjeri da ponudu za preuzimanje prihvate ili odbiju i
 - e) izjašnjavanje članova uprave i nadzornog odbora o postojanju njihovog sporazuma s ponudiocem u vezi s ponudom za preuzimanje, kao i sadržaj takvog sporazuma, ako sporazum postoji.
- (2) Prije objave mišljenja iz stava 1 ovog člana, uprava i nadzorni odbor ciljnog društva dužni su to mišljenje, u roku od pet dana od dana objave ponude za preuzimanje, predložiti predstavnicima zaposlenika, odnosno zaposlenicima ako nema predstavnika zaposlenika, koji u roku od tri dana od dana kada im je ono predloženo, mogu dati svoje mišljenje o ponudi za preuzimanje.
 - (3) Ako uprava i nadzorni odbor ciljnog društva, u roku iz stava 2 ovog člana, zaprima mišljenje predstavnika zaposlenika o ponudi za preuzimanje, dužni su isto priložiti mišljenju uprave i nadzornog odbora kod objave.
 - (4) Ako mišljenje o ponudi za preuzimanje ili mišljenje zaposlenika sadrži lažne informacije ili informacije koje mogu dovesti u zabludu, lica koja su izradila ili sudjelovala u izradi mišljenja, solidarno su odgovorna dioničarima za štetu ukoliko su znala ili trebala znati da su te informacije lažne ili dovode u zabludu.
 - (5) Mišljenje o ponudi za preuzimanje ciljno društvo dužno je dostaviti Komisiji, istovremeno s dostavljanjem uređenom tržištu na objavljivanje.

Član 38 (Pravilo proboja)

- (1) Ciljno društvo može u statutu predvidjeti da se na društvo primjenjuju odredbe člana 39 ovog zakona ili takvu odredbu, ukoliko je ima, ukinuti u svom statutu.
- (2) Uprava ciljnog društva dužna je obavijestiti Komisiju, a nakon prijema u članstvo Evropske unije i nadzorne organe država članica Evropske unije u kojima je odobreno trgovanje dionicama ciljnog društva na uređenom tržištu, o tome da je ciljno društvo usvojilo ili ukinulo odredbu statuta iz stava 1 ovog člana, kao i odluke iz člana 34 stava 8 ovog zakona, najkasnije u roku od tri dana od dana donošenja izmjene ili dopune statuta, odnosno novog statuta ili donošenja odluke.
- (3) Na sazivanje i vođenje skupštine primjenjuju se odredbe člana 34 stavova 6, 7 i 8 ovog zakona.

Član 39 (Sadržaj pravila proboja)

- (1) U toku trajanja ponude za preuzimanje, na prenos dionica ciljnog društva ponudiocu, nemaju učinak ograničenja prenosa dionica ciljnog društva određena:
 - a) statutom, odnosno drugim općim aktom ciljnog društva;
 - b) sporazumom između ciljnog društva i dioničara ciljnog društva i
 - c) sporazumom između dioničara ciljnog društva.
- (2) Kada nakon ponude za preuzimanje ponudilac stekne 75% (sedamdeset pet posto) dionica s pravom glasa ciljnog društva, na prvoj skupštini sazvanoj na zahtjev ponudioca radi izmjene statuta, imenovanja ili opoziva članova nadzornog odbora:
 - a) nemaju učinak ograničenja prenosa dionica i ograničenja glasačkih prava;
 - b) nemaju učinak posebna prava dioničara na imenovanje ili opoziv članova nadzornog odbora, koja su predviđena zakonom ili drugim propisom ili na osnovu zakona ili drugog propisa i

- c) ponudilac ima pravo, nezavisno od rokova za sazivanje skupštine određenim Zakonom o preduzećima, tražiti da skupština ciljnog društva bude sazvana najkasnije 14 dana prije dana održavanja skupštine.
- (3) U slučaju da se na osnovu ovog člana gube određena prava, ponudilac je dužan isplatiti primjereno obeštećenje u novcu.
- (4) Pravo na obeštećenje u skladu sa stavom 3 ovog člana može se tražiti sudskim putem u roku od dva mjeseca od oduzimanja prava.

Član 40 **(Prinudna prodaja)**

- (1) Ako nakon ponude za preuzimanje ponudilac i lica koja s njim zajednički djeluju steknu najmanje 95% (devedeset pet posto) dionica s pravom glasa ciljnog društva, ponudilac u roku od tri mjeseca od isteka roka trajanja ponude za preuzimanje ima pravo na prenos dionica s pravom glasa manjinskih dioničara uz pravičnu naknadu, pod uslovom da je u ponudi za preuzimanje naveo da će koristiti pravo prinudne prodaje.
- (2) Ponudilac iz stava 1 ovog člana podnosi Registru zahtjev za prenos dionica manjinskih dioničara najkasnije u roku od tri mjeseca od dana isteka krajnjeg roka iz ponude za preuzimanje.
- (3) Ponudilac je dužan istovremeno s podnošenjem zahtjeva iz stava 2 ovog člana o zahtjevu obavijestiti manjinske dioničare, Komisiju, ciljno društvo i uređeno tržište na kojem su uvrštene u trgovanje dionice ciljnog društva te isti bez odgode objaviti na način propisan ovim zakonom za objavljivanje ponude za preuzimanje.
- (4) Pravična naknada iz stava 1 ovog člana se obračunava kao ponderisani prosjek svih cijena ostvarenih na uređenom tržištu na kojem su dionice ciljnog društva uvrštene u trgovanje za svako sljedeće tromjesečje posebno, počevši od tromjesečja koje prethodi danu nastanka obaveze za objavljivanje ponude za preuzimanje do dana podnošenja zahtjeva za prenos dionica manjinskih dioničara, s tim da je ponudilac dužan u ponudi za preuzimanje ponuditi minimalno najvišu tromjesečnu prosječnu cijenu izračunatu u navedenom periodu, ako je ta cijena viša od cijene iz ponude za preuzimanje.
- (5) Ponudilac je dužan za izračunavanje pravične naknade osigurati potvrdu uređenog tržišta na kojem su uvrštene dionice ciljnog društva i priložiti je uz zahtjev za prenos dionica manjinskih dioničara.
- (6) Radi osiguranja naknade iz stava 1 ovog člana ponudilac je dužan na poseban račun kod depozitara izdvojiti novčana sredstva ili osigurati neopozivu bankarsku garanciju, na prvi poziv izdatu u korist manjinskih dioničara, na iznos potreban za plaćanje svih dionica manjinskih dioničara.
- (7) U periodu iz stava 2 ovog člana dioničar ne može zalagati svoje dionice.
- (8) Registar vrši prenos dionica s računa manjinskih dioničara koji nisu prihvatili ponudu za preuzimanje na račun ponudioca i isplatu novčanih sredstava na račun manjinskih dioničara, nakon što utvrdi da:
- a) nakon ponude za preuzimanje ponudilac i lica koja s njim zajednički djeluju posjeduju najmanje 95% (devedeset pet posto) dionica s pravom glasa ciljnog društva;
 - b) je ponudilac za dionice koje su predmet zahtjeva osigurao naknadu iz stava 4 ovog člana i
 - c) nije istekao rok od tri mjeseca od isteka roka trajanja ponude za preuzimanje.
- (9) Za poslove deponovanja, otvaranja računa i isplate novčanih sredstava i druge poslove u postupku preuzimanja i prenosa dionica primjenjuju se propisi regulatornih područja na čijem su uređenom tržištu uvrštene dionice izdavalaca s područja Distrikta.
- (10) Ukoliko manjinski dioničari nisu zadovoljni pravičnom naknadom u postupku prinudne prodaje, mogu zaštitu svojih prava tražiti putem suda.

Član 41 **(Prinudna kupovina)**

- (1) Kada je ponudilac otkupio najmanje 95% (devedeset pet posto) dionica ciljnog društva, obavezan je kupiti dionice preostalih dioničara na njihov zahtjev, a pod uslovima iz ponude za preuzimanje.
- (2) Ponudilac koji je stekao najmanje 95% (devedeset pet posto) dionica ciljnog društva, nakon okončanja postupka preuzimanja mora osigurati novčana sredstva, odnosno bankarsku garanciju za plaćanje preostalih dionica ciljnog društva i ne smije ih povlačiti do isteka roka od tri mjeseca u kojem manjinski dioničar može podnijeti zahtjev iz stava 1 ovog člana.
- (3) Manjinski dioničar iz stava 1 ovog člana može podnijeti zahtjev ponudiocu najkasnije u roku od tri mjeseca od dana sticanja najmanje 95% (devedeset pet posto) dionica od strane ponudioca, obavještavajući ga o klasi i broju dionica koje nudi na prodaju.
- (4) U slučaju podnošenja zahtjeva iz stava 1 ovog člana, ponudilac je dužan otkupiti dionice manjinskih dioničara po cijeni iz ponude za preuzimanje.
- (5) Registar vrši prenos dionica s računa papira od vrijednosti manjinskih dioničara na račun papira od vrijednosti ponudioca i vrši isplatu novca na račune manjinskih dioničara.
- (6) Ako ponudilac ne izvrši obavezu iz stava 1 ovog člana, manjinski dioničari imaju pravo zahtijevati ispunjenje obaveze putem suda.

POGLAVLJE VI. POSTUPANJE KOMISIJE I ZAŠTITA PRAVA

Član 42 **(Mjere u nadzoru i ovlaštenja Komisije)**

- (1) Kada utvrdi nepravilnosti ili nezakornitosti u toku ili nakon okončanja postupka preuzimanja, Komisija može naložiti preuzimanje radnji radi otklanjanja nepravilnosti ili nezakornitosti, odnosno izreći mjeru propisanu ovim zakonom.
- (2) U slučaju iz stava 1 ovog člana Komisija određuje rok za izvršenje te dostavljanje dokaza o učinjenom.
- (3) Komisija može preduzeti sljedeće mjere:
 - a) utvrditi postojanje obaveze objavljivanja ponude za preuzimanje te naložiti preuzimanje radnji radi objavljivanja ponude za preuzimanje;
 - b) naložiti izmjenu, dopunu ili povlačenje ponude za preuzimanje;
 - c) zatražiti dostavljanje ili objavljivanje dodatnih podataka ili informacija, izjašnjavanja, obavijesti ili ispravki u vezi s ponudom za preuzimanje;
 - d) proglasiti ponudu za preuzimanje nevažećom;
 - e) poništiti odobrenje ponude za preuzimanje;
 - f) obustaviti daljnji promet dionica koje su bile predmet ponude za preuzimanje;
 - g) izreći druge mjere koje su potrebne radi otklanjanja posljedica koje su nastale izvršenjem ili propuštanjem radnji i
 - h) javno objaviti sve preduzete mjere i sankcije koje su izrečene radi utvrđenih nepravilnosti ili nezakornitosti.
- (4) Rješenje kojim su preduzete mjere u skladu sa stavom 3 ovog člana Komisija dostavlja ciljnom društvu, dioničarima putem ciljnog društva, Registru i uređenom tržištu na kojem su uvrštene dionice ciljnog društva.
- (5) Ako ponudilac ne postupi u skladu s rješenjem Komisije iz stavova 1 i 4 ovog člana, Komisija može obustaviti postupak preuzimanja i staviti van snage rješenje o odobrenju ponude za preuzimanje ili novim rješenjem izreći novu ili istu mjeru.

- (6) Ciljno društvo, dioničari ciljnog društva, ovlašteni učesnici, ponudilac kao i ostala pravna i fizička lica dužni su, na zahtjev Komisije, Komisiji omogućiti uvid i dostaviti dokumentaciju koju Komisija smatra potrebnom za provođenje nadzora u postupku utvrđivanja obaveze preuzimanja ili zajedničkog djelovanja, kao i nadzora u postupku preuzimanja.
- (7) Ciljno društvo je dužno Komisiji, na njen zahtjev, dati na uvid ili dostaviti sve podatke o vlasnicima dionica ili odgovarajuće izvode iz liste dioničara.

Član 43 **(Prava dioničara kod neobjavlivanja ponude za preuzimanje)**

Ako ponudilac ne objavi ponudu za preuzimanje u skladu s ovim zakonom, svaki dioničar ciljnog društva može putem suda zahtijevati obavezno zaključenje ugovora o prodaji dionica, pod uslovima pod kojima je morala biti objavljena ponuda za preuzimanje.

Član 44 **(Dostavljanje pismena)**

- (1) Pismena koja je Komisija u skladu s ovim zakonom, dužna dostaviti fizičkim i pravnim licima, dostavlja na prijavljenu adresu.
- (2) Ukoliko se lica iz stava 1 ovog člana ne nalaze na prijavljenoj adresi, pismeno se smatra uredno dostavljenim ukoliko se objavi na oglasnoj ploči Vlade Brčko distrikta Bosne i Hercegovine ili web-stranici Komisije.
- (3) Ukoliko lica iz stava 1 ovog člana, kojima je potrebno uručiti rješenje ili drugi akt, imaju prebivalište ili sjedište u inostranstvu, dostava se vrši punomoćniku tih lica koji ima sjedište u BiH, a ako nema punomoćnika dostava se smatra izvršenom objavom na web-stranici Komisije ili uređenog tržišta.

Član 45 **(Saradnja s drugim organima i čuvanje poslovne tajne)**

- (1) Komisija i nadzorni organi u oblasti tržišta papira od vrijednosti u BiH i inostranstvu sarađuju i međusobno razmjenjuju podatke, kada je to potrebno za primjenu zakona koji uređuju područje preuzimanja dioničkih društava shodno Ustavu Bosne i Hercegovine, ustavima entiteta, Statutu Brčko distrikta Bosne i Hercegovine i drugim zakonima BiH, entiteta i Distrikta.
- (2) Članovi i zaposlenici Komisije i bivši zaposlenici dužni su za vrijeme rada, kao i nakon prestanka radnog odnosa u Komisiji, čuvati sve podatke kao poslovnu tajnu u skladu sa zakonom.

Član 46 **(Akti Komisije)**

Protiv rješenja Komisije nije dozvoljena žalba, ali se može podnijeti tužba Osnovnom sudu Brčko distrikta Bosne i Hercegovine za pokretanje upravnog spora u roku od 30 dana od dana dostavljanja rješenja.

POGLAVLJE VII. PREKRŠAJNE ODREDBE

Član 47 **(Prekršaji)**

- (1) Novčanom kaznom od 5.000 KM do 15.000 KM kaznit će se za prekršaj pravno lice ako:

- a) o sticanju bez odlaganja ne obavijesti Komisiju, ciljno društvo i uređeno tržište ili ne objavi ponudu za preuzimanje (član 8 ovog zakona);
- b) dioničarima ciljnog društva uputi ponudu mimo odredaba ovog zakona, odnosno dioničarima ciljnog društva uputi javni ili drugi poziv s ciljem sticanja dionica ciljnog društva s pravom glasa (član 9 ovog zakona);
- c) ostvari pravo glasa suprotno članu 11 ovog zakona;
- d) ponuda za preuzimanje ne sadrži sve podatke iz člana 12 ovog zakona;
- e) ne isplati dioničarima razliku u cijeni u roku od sedam dana od dana sticanja (član 14 stav 8 ovog zakona);
- f) u slučaju uslovne ponude svojim djelovanjem utiče na ispunjenje uslova iz ponude suprotno članu 15 stavu 2 ovog zakona;
- g) ne dostavi obavještenje o namjeri objavljivanja ponude za preuzimanje Komisiji, ciljnom društvu i uređenom tržištu u skladu s članom 16 stavom 2 ovog zakona i isto obavještenje ne objavi u skladu s članom 24 ovog zakona;
- h) objavi namjeru sticanja dionica ciljnog društva u sredstvima javnog informisanja i u elektronskim medijima dostupnim javnosti suprotno članu 17 ovog zakona;
- i) povuče ponudu za preuzimanje suprotno članu 19 ovog zakona;
- j) ne podnese Komisiji zahtjev za odobrenje objavljivanja ponude za preuzimanje i zahtjev za izmjenu ponude za preuzimanje (član 20 stavovi 1 i 5 ovog zakona);
- k) ne osigura sredstva za plaćanje svih dionica na koje se odnosi ponuda za preuzimanje (član 22 stavovi 1 i 2 ovog zakona);
- l) rok trajanja bankarske garancije ugovori suprotno odredbi člana 22 stava 3 ovog zakona;
- m) raspolaže novčanim sredstvima ili papirima od vrijednosti izdvojenim na posebnom računu suprotno odredbama člana 22 stavova 4 i 5 ovog zakona;
- n) postupi suprotno članu 22 stavu 6 ovog zakona;
- o) ne postupi u skladu s članom 23 ovog zakona;
- p) ne objavi ponudu za preuzimanje i svaku izmjenu ponude za preuzimanje (član 24 stavovi 1, 2, 3 i 5 ovog zakona);
- q) ponudu za preuzimanje ili izmjenu ponude ne dostavi ciljnom društvu, uređenom tržištu na kojem se trguje dionicama ciljnog društva, Registru i ovlaštenom učesniku i obavijesti svoje zaposlene i predstavnike zaposlenih, prvi naredni radni dan od dana prijema rješenja Komisije (član 24 stav 8 ovog zakona);
- r) ne obavijesti predstavnike zaposlenih, odnosno zaposlene o sadržaju ponude za preuzimanje (član 24 stav 9 ovog zakona);
- s) mijenja ponudu za preuzimanje suprotno članu 25 ovog zakona;
- t) vrši uticaj na dioničare ciljnog društva direktno ili oglašavanjem putem sredstava javnog informisanja, nuđenjem ili obećanjem poklona, usluga, imovinske ili druge koristi (član 26 ovog zakona);
- u) izvrši plaćanje dionica suprotno članu 27 stavovima 2 i 3 ovog zakona;
- v) raspolaže dionicama koje je deponovao radi prihvata ponude (član 27 stav 4 ovog zakona);
- w) preuzme deponovane dionice suprotno članu 31 stav 2 ovog zakona;
- x) ne objavi i ne dostavi Komisiji, ciljnom društvu i uređenom tržištu izvještaj o preuzimanju s propisanim podacima (član 32 stavovi 1 i 2 ovog zakona);
- y) postupi suprotno članu 32 stavovi 3 i 5 ovog zakona;
- z) ne isplati cijenu dionica ili ne podmiri sve troškove prenosa dionica nastalih u postupku preuzimanja (član 33 ovog zakona);
- aa) od trenutka zaprimanja obavještenja do okončanja postupka preuzimanja predvidi u osnivačkom aktu ili statutu ograničenja u pogledu broja glasova koje nose dionice s pravom glasa (član 35 stav 1 ovog zakona);
- bb) postupi suprotno članu 36 stavu 1 ovog zakona;

- cc) ne dostavi mišljenje o ponudi za preuzimanje Komisiji istovremeno s dostavljanjem uređenom tržištu na objavljivanje (član 37 stav 5 ovog zakona);
 - dd) ne obavijesti Komisiju i nadzorne organe država članica Evropske unije u skladu s članom 38 stavom 2 ovog zakona;
 - ee) o zahtjevu za prenos dionica ne obavijesti manjinske dioničare, Komisiju, ciljno društvo i uređeno tržište ili obavještenje ne objavi (član 40 stav 3 ovog zakona);
 - ff) ne omogući Komisiji uvid ili ne dostavi dokumentaciju koju Komisija smatra potrebnom za provođenje nadzora (član 42 stav 6 ovog zakona) i
 - gg) ne omogući Komisiji uvid ili ne dostavi sve podatke o vlasnicima dionica ili odgovarajuće izvode iz liste dioničara (član 42 stav 7 ovog zakona).
- (2) Za prekršaje iz stava 1 ovog člana kaznit će se odgovorno lice u pravnom licu novčanom kaznom od 200 KM do 2.000 KM.
- (3) Za prekršaje iz stava 1 ovog člana kaznit će se fizičko lice, kao sticalac dionica, novčanom kaznom od 400 KM do 1.500 KM.

Član 48 **(Prekršaji člana uprave i nadzornog odbora ciljnog društva)**

Novčanom kaznom od 500 KM do 1.500 KM kaznit će se fizičko lice – član uprave i nadzornog odbora ciljnog društva ako:

- a) bez odobrenja skupštine postupa suprotno članu 34 stavu 1 ovog zakona;
- b) ne objavi svoje obrazloženo mišljenje o ponudi za preuzimanje na propisani način (član 37 stavovi 1 i 2 ovog zakona) i
- c) ne priloži zaprimljeno mišljenje predstavnika zaposlenika o ponudi za preuzimanje u skladu s članom 37 stavom 3 ovog zakona.

Član 49 **(Zastara)**

- (1) Prekršajni postupak za prekršaje propisane ovim zakonom ne može se pokrenuti niti voditi ako je od dana kada je prekršaj počinjen protekao rok od tri godine.
- (2) Zastarjelost se prekida svakom radnjom nadležnog organa preduzetom radi gonjenja učinioa prekršaja.
- (3) Svakim prekidom zastarijevanje počinje ponovo da teče, ali bez obzira na prekide, zastarjelost u svakom slučaju nastaje kada protekne šest godina od dana kada je prekršaj počinjen.

DIO TREĆI – PRELAZNE I ZAVRŠNE ODREDBE

Član 50 **(Postupci koji nisu okončani)**

- (1) Postupci preuzimanja dioničkih društava povodom zahtjeva za objavljivanje ponude za preuzimanje koji su pokrenuti do dana stupanja na snagu ovog zakona dovršit će se u skladu sa zakonom koji je bio na snazi u vrijeme podnošenja zahtjeva.
- (2) Lica kojima je nastala obaveza za objavljivanje ponude za preuzimanje, a koja do dana stupanja na snagu ovog zakona nisu podnijela zahtjev za odobrenje objavljivanja ponude za preuzimanje, dužna su nastalu obavezu izvršiti u skladu s odredbama ovog zakona.

Član 51 **(Prava dioničara)**

- (1) Dioničari koji na dan stupanja na snagu ovog zakona raspolažu s više od 25% (dvadeset pet posto), a manje od 75% (sedamdeset pet posto) dionica s pravom glasa dioničkog društva, a koji nakon stupanja na snagu ovog zakona imaju namjeru daljnjeg sticanja dionica s pravom glasa tog društva, dužni su objaviti ponudu za preuzimanje u skladu s odredbama ovog zakona.
- (2) Dioničari koji na dan stupanja na snagu ovog zakona drže više od 75% (sedamdeset pet posto) dionica s pravom glasa ciljnog društva, a nisu bili dužni objaviti ponudu za preuzimanje u slučaju daljnjeg sticanja dionica s pravom glasa ciljnog društva, dužni su objaviti ponudu za preuzimanje u skladu s odredbama ovog zakona.
- (3) Dioničari za koje se nije smatralo da djeluju zajednički, a koji prema odredbama ovog zakona djeluju zajednički i koji na dan stupanja na snagu ovog zakona zajednički posjeduju više od 25% (dvadeset pet posto) dionica s pravom glasa ciljnog društva, u slučaju daljnjeg sticanja dionica s pravom glasa ciljnog društva, dužni su objaviti ponudu za preuzimanje u skladu s odredbama ovog zakona.

Član 52
(Stavljanje van snage)

Danom stupanja na snagu ovog zakona stavlja se van snage Zakon o preuzimanju dioničkih društava (Službeni glasnik Brčko distrikta BiH, brojevi: 31/05, 33/12 i 34/12).

Član 53
(Stupanje na snagu)

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-729/19
Brčko, 4. 12. 2019. godine

PREDSJEDNIK
SKUPŠTINE BRČKO DISTRIKTA BiH
Esed Kadrić